

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

KPDNHEP TELAH GERAKKAN SKUAD SUKARELAWAN BANJIR BANTU MANGSA BANJIR DI SELURUH NEGARA

PUTRAJAYA, 7 Januari 2022 – Skuad Sukarelawan Banjir Kementerian Perdagangan Dalam Negeri dan Hal Ehwal Pengguna (SSB-KPDNHEP) yang ditubuhkan sebaik sahaja banjir bencana banjir melanda negara telah digerakkan dalam misi bantuan kerja-kerja pembersihan dan penyaluran bantuan kemanusiaan kepada mangsa-mangsa banjir di seluruh negara sejak 23 Disember 2021.

2. Di antara lokasi terawal yang menerima bantuan SSB-KPDNHEP adalah kawasan-kawasan berhampiran Putrajaya seperti Dengkil, Banting, Sepang, Shah Alam dan Semenyih. Baru-baru ini, KPDNHEP melalui SSB-KPDNHEP dan FoodBank Malaysia di bawah kelolaan Kementerian telah turut serta menyalurkan bantuan kepada mangsa banjir yang melibatkan kakitangan Kementerian yang terkesan meliputi Negeri Selangor, Kuala Lumpur, Pahang, Negeri Sembilan, Kelantan, Terengganu dan Melaka dalam bentuk kerja-kerja pembersihan serta barang-barang yang sedia dimakan.

3. Sehubungan dengan itu, sebanyak 12 Pasukan SSB-KPDNHEP telah digerakkan pada 24 Disember 2021 (Jumaat), 25 Disember 2021 (Sabtu) dan 27 Disember 2021 (Isnin) bagi memberi bantuan bencana kepada 171

keluarga yang terlibat di dalam bencana banjir meliputi kawasan Shah Alam, Banting, Dengkil, Sepang, Kapar, Semenyih, Klang, Puchong dan di Pahang. Bantuan-bantuan yang telah diberikan adalah seperti kerja-kerja pembersihan rumah mangsa banjir, lawatan ke lokasi bencana dan Pusat Pemindahan Sementara (PPS), lawatan ke rumah penginapan sementara mangsa banjir, sumbangan bahan makanan dan minuman, kutipan derma kilat, sumbangan pakaian, Kelengkapan Perlindungan Diri (PPE) dan cecair sanitasi dan bekalan ubat-ubatan.

4. Ketua Pengarah Perkhidmatan Awam pada 28 Disember 2021 telah mengkhususkan KPDNHEP ke Daerah Kuala Selangor sebagai kawasan angkat bagi penumpuan misi bantuan pasca banjir seperti mempercepatkan kerja-kerja pembersihan rumah mangsa banjir dan penyaluran sumbangan kemanusiaan kepada komuniti di kawasan terjejas. Pada 29 Disember 2021, KPDNHEP melalui Pejabat Daerah Kuala Selangor telah mengatur gerak kerja dua (2) SSB-KPDNHEP iaitu Kumpulan 1 seramai 20 orang telah menjalankan misi ke Dewan Rafulin, Sekolah Kebangsaan Kampung Bukit Badong, Ijok, Kuala Selangor dan Rumah Penduduk Jalan Robinson, Ijok, Kuala Selangor; manakala Kumpulan 2 seramai 33 orang kakitangan KPDNHEP pula telah digerakkan ke Surau Al Ehsan, Sg. Betung Batu 11 ½, Kg. Sg. Serai, Hulu Langat, Selangor dan Rumah Penduduk Sg. Betung Batu 11 ½, Kg. Sg. Serai, Hulu Langat Selangor.

5. Selain itu, pasukan SSB-KPDNHEP juga telah ke Sekolah Menengah Jeram, Kuala Selangor yang telah dijadikan sebagai PPS bagi mangsa-mangsa banjir. Gerak kerja yang telah dilaksanakan melibatkan pembersihan dalam dan luar dewan, pembersihan longkang, pembersihan tandas, pembersihan sampah, pembersihan kelas dan sekitar sekolah dan

lain-lain pembersihan yang diarahkan sebagai persediaan pembukaan semula sesi persekolahan. SSB juga telah menyerahkan sumbangan kepada Penghulu Mukim Ijok, Ketua Kampung Jeram dan penduduk kampung berupa *hamper* daripada Food Bank Malaysia yang terdiri daripada makanan dan barangan keperluan diri.

6. Bermula 19 Disember 2021 sehingga 28 Disember 2021 Sekretariat Food Bank Malaysia (SFBM) KPDNHEP dan Rakan Strategik Utama SFBM telah mengagihkan sumbangan makanan dan keperluan diri kepada 5,524 Ketua Isi Rumah (KIR). KPDNHEP juga telah menerima sumbangan daripada Suruhanjaya Syarikat Malaysia yang membekalkan kelengkapan dan peralatan yang diperlukan oleh Pasukan SSB-KPDNHEP untuk menjalankan kerja-kerja pembersihan rumah mangsa banjir dengan kos bantuan sebanyak RM92,000.00.

7. Food Bank Malaysia pula telah menerima sumbangan dari rakan strategik seperti Legasi Z Sufi iaitu berupaya 3,500 pax sumbangan keperluan dengan nilai anggaran sumbangan RM175,000.00, Shopee berupa 1,000 pax sumbangan keperluan dengan nilai anggaran sumbangan RM100,000.00; 99 Speedmart berupa 1,000 pax sumbangan keperluan dengan nilai anggaran sumbangan RM50,000.00. KPDNHEP juga telah menerima sumbangan-sumbangan daripada pihak lain dalam jumlah kuantiti yang kecil;

8. Pejabat KPDNHEP di negeri-negeri yang terjejas dengan bencana banjir juga telah menubuhkan Pusat Arahan SSB-KPDNHEP bagi menyelaras misi bantuan SSB-KPDNHEP di peringkat negeri termasuklah

Pejabat KPDNHEP Negeri Kelantan dan Terengganu yang telah bersiaga dalam menghadapi risiko kejadian banjir Monsun Timur Laut.

9. YB Dato Sri Menteri, YB Dato' Timbalan Menteri, YBhg. Datuk Seri KSU serta Pengurusan Tertinggi Kementerian turut terlibat turun padang bersama SSB-KPDNHEP dalam misi kerja-kerja pembersihan dan penyaluran bantuan kepada mangsa banjir yang terkesan. Bagi misi bantuan selanjutnya, KPDNHEP telah berhubung dengan Pejabat Daerah Kuala Selangor selaku penyelaras misi bantuan kawasan tersebut untuk pasukan SSB-KPDNHEP meneruskan misi bantuan pembersihan dan penyaluran bantuan peralatan dan makanan. Pada hari ini, YB Menteri serta Pengurusan Tertinggi Kementerian menyantuni dan menyampaikan sumbangan kepada penduduk Sungai Rambai, Melaka yang terjejas akibat banjir di Pusat Penempatan Sementara (PPS) SMK Sungai Rambai.

10. KPDNHEP mengucapkan terima kasih kepada semua rakan strategik dan berharap lebih banyak syarikat swasta tampil membantu meringankan beban yang dialami oleh mangsa banjir.

11. KPDNHEP juga mengucapkan terima kasih kepada NGO-NGO, sukarelawan-sukarelawati yang telah bersama dalam misi bantuan ini. Masa ujian ini telah menyerlahkan semangat Keluarga Malaysia yang tinggi dan terpuji dalam situasi ringan sama dijinjing dan yang berat sama dipikul merentasi garis kaum, bangsa dan agama. Syabas Keluarga Malaysia.

Kementerian Perdagangan Dalam Negeri Dan Hal Ehwal Pengguna
PUTRAJAYA, 7 Januari 2022

#####

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran.

Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampunkan sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapi dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusniaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP:

